



Komunikadu Imprensa
Tribunál Distritál Suai
02 Agostu 2018

Tribunál tenke avalia no konsidera sirkunstánsia no dezafiu estruturál no sosiál relevente sira hotu iha kazu violasaun seksuál sira antes halo desizaun

Tribunál tenke avalia no konsidera sirkunstánsia no dezafiu estruturál no sosiál relevente sira hotu iha kazu ho natureza violasaun seksuál antes halo desizaun ba kazu ne'e.

Iha kontestu Timor-Leste, partikularmente comunidade sira área rural, maioria enfrenta hela dezafiu estruturál no sosial/kulturál no limitasaun oioin kona-ba oinsá sira bele asesu ba informasaun ida-ne'ebé loloos no apropriadu bainhira sira tama iha problema ruma. Satán ho sira nia-koñesimentu ne'ebé limitadu kona-ba sistema justisa formál ninia funsionamentu regulár sira no ninia rekezitu tekniku sira, normalmente ida-ne'e la'os nu'udar materia ne'ebé fasil ba sira atu kumpriende.

JSMP preokupa katak iha 22 Juñu 2017, Tribunál Distritál Suai absolve kazu krime violasaun seksuál ne'ebé envolve arguidu DM hasoru AdS ne'ebé ho idade tinan 17 tanba konsidera arguidu ninia hahalok la prienxe rekezitu sira tuir artigu 172 Kódigu Penál kona-ba violasaun (seksuál) ne'ebé akontese dala haat durante tinan 2017, iha Distritu Bobonaro.

“Desizaun ne'e substansialmente iha risku no prejudika bein-komun iha sosiedade tanba sei enkoraza arguidu atu komete hahalok hanesan iha futuro. Ida-ne'e mós sei haruka mensajen ba públiku katak ema kaben-na'in ne'ebé iha esperensia ona iha vida seksuál bele aproveita ignoránsia no vulnerabilidade sosiál vítima sira hodi satisfás arguidu sira ninia dezeju (*hasrat*) seksuál sein simu konsekuénsia no responsabilidade ba aktu ne'ebé nia komete,”dehan Diretór Ezekutivu, Luis de Oliveira Sampaio.

“Desizaun ne'e mós sei loka dalan ne'ebé luan liu tanba sei fó oportunidade ba arguidu potenciál seluk atu komete hahalok irresponsavel hanesan, tanba sira aprende ona hosi frakeza no fallansu sira hosi desizaun judisiál hirak-ne'e”, nia subliña.

Tribunál tenke prezume katak feto ho tinan 17 no moris iha área rurál ho nível edukasaun ne'ebé kiik no limitadu hamutuk ho sociedade ne'ebé maioria la iha edukasaun no koñesimentu ne'ebé adekuada, nu'udar dezafiu boot ida atu buka informasaun no apoiu ida-ne'ebé nesesáriu no imediata ba ninia nesesidade kazu nian.

Desizaun ne'e iha tendénsia katak tribunál favorese no fiar liubá arguidu tanba arguidu deklarata katak relasaun seksuál ne'e akontese ho konsentimentu, laiha ameasa no violénsia hosi arguidu. Iha parte seluk lezada kontinua mantein ninia pozisaun katak relasaun seksuál ne'e akontese ho forma ameasa durante no depoisde akontesimentu no arguidu uza meius ameasa ne'ebé hanesan (ho tudik) antes no depoisde komete krime ne'e. Iha kazu ne'e la iha testemuña seluk atu reforsa no prova deklarasaun entre arguidu no lezada ne'ebé ida-idak mantein no defende nia pozisaun.

Tribunál mós bazeia ba rezultadu akareasaun ne'ebé arguidu tenta dezafia lezada katak se relasaun ne'e akontese ho meu ameasa no violénsia; tanbasá kuandu arguidu konvida lezada sempre tuir deit. Arguidu mós kestiona katak tanbasá lezada la keixa iha akontesimentu primeiru atu evita iha tan relasaun ne'e to'o akontese dala haat no kauza lezada grávida. Mézmuke, tribunál la-iha faktu ka evidensia seluk ne'ebé bele prova katak arguidu ninia argumentu ne'e loos.

Tribunál mós konsidera katak problema ne'e mosu bainhira lezada grávida ona no família tenta rezolve tuir kultura maibé arguidu tenta atu ses-an hosi problema ne'e, tanba ne'e mak vítima no família keixa arguidu. JSMP hanoin katak konsiderasaun ne'e la relevante tanba normalmente iha kualkér problema ne'ebé mosu iha sociedade rurál sira aprosimasaun primeiru ne'ebé sira halo mak buka solusaun familiar. Ne'e la signifika sira ignora prosedimentu kriminál tanba sira la iha duni koñesimentu adekuaadu kona-ba oinsa atu trata problema ne'e tuir rekizitu sira hosi justisa formal nian.

Maske tribunál husu lezada hodi halo prosesu ba arguidu liuhosi prosesu sivíl atu arguidu toma responsabilidade alimentár ba sira nia oan maibé JSMP konsidera desizaun ne'e la-apropriadu no sei iha-risku boot tebes tanba fó lisaun negativu ba sociedade no sei hatudu dalan ba arguidu potensial seluk atu komete krime hanesan iha futuru.

Iha kazu ho natureza seksuál sira, importante teb-tebes atu asegura katak elementu no sirkunstánsia relevante sira hetan konsiderasaun, nune'e asegura desizaun sira ne'e kontribui ba proteze bein-kumun no trunkualidade públiku. JSMP hanoin katak pelumenus tribunál tenke aplika pena ruma ho dever adisionál seluk atu eduka arguidu no sociedade hodi prevene kazu hanesan akontese iha futuru.

JSMP observa katak durante produsaun ba prova sira to'o iha akareasaun lezada mantein katak relasaun ne'e akontese ho meius ameasa no violénsia. Arguidu mós rekoñese katak relasaun

seksuál akontese duni no deklara katak nia-arrepênde ona ninia hahalok ne'e. Faktu hirak ne'e tuir loloos sai sasukat ba tribunál atu la absolve totalmente arguidu hosi krime ne'e.

JSMP preokupadu tanba desizaun ne'e sei enkoraja ema seluk atu aproveita frakeza iha Kódigu Penál aplikavel hodi kontinua komete krime hanesan iha futuru hasoru feto-ran sira. Tribunál tenke iha kapasidade atu deteta no iha prudênsia atu sukat impaktu potensíal sira desizaun ne'ebé sira halo atu asegura protesaun ba lezada rasik no proteze bein-komun iha sosiedade.

Julgamentu ne'e prezide hosi juis koleтиву kompostu hosi Dra. Florensia Freitas, Dr. Nasson Sarmiento no Dr. Samuel da Costa Pacheco. Entretantu Ministériu Públiku reprezenta hosi Dr. Ricardo Leite Godinho no arguidu reprezenta hosi Advogadu Privadu, Dr. Gaspar Ferreira Gusmão.

Atu hetan informasaun liutan favor kontaktu:

Luis de Oliveira Sampaio

Diretór Ezekutivu JSMP

E-mail: luis@jsmp.tl

www.jsmp.tl